

SUHANO PAULUS SO UMATI WE FILIPI

Kaatono Wamba

Filipi se'onu kota we kadieno Makedonia (Yunani ampa aitu). Umati marasaeano we Filipi kabhao-bhaono dofetingke Bhihita Metaa mai'ao ne Paulus wakutuu noangkai kotando (Tul 16:12-40). Suhano Paulus ini nobuhie mai'ao weo katohongku we Roma.

Katibuhi'ano suha aini mba'inomo Paulus nofosampeanda katumpuno lalono hampano umati we Filipi dopakatuanemo dhoi, do'ondofaane kafaraluuno wakutuuno nokadee-dee. Anoa nesalo ne umati we Filipi dadumadi pometa-metaa neanomo kase'ise bhe Kristus sadaa-daa bhe napobhaianda kabarakatino Lahata'ala.

Weo suhano ini nofohatoanda nandoo mie fofoguhu'aono kafoina'u umala. Tamaka mahinggamo peda na'a Paulus sadaa-daa nowula lalono bhe noposahuna'ao hampano noparasaea mpuu ne Kristus. Wamba “kawulano lalo” naembali dakumona kunsinomo kafoina'u weo suha aini, nentuhu nofendu-fendua'e. Nentalea dua notiwoha ne suha aini putae Paulus noasi'ao mpuu umati we Filipi.

Kalengkano suha

1:1-2

1 Suha aini nomai'ao ne insaodi Paulus bhe Timotius, palimalimano Kristus Yesus. Tapakatue so kosasawimiu umati mongkilono Lahata'ala se'iseno bhe Yesus Kristus meateno we Filipi, poowa-owaomu dua bhe neangka'indo bhe umondofaono umati.^a
²Sio-siomo napobhaiangkoomu kabarakati bhe katohopono dadi mai'ao ne Lahata'ala Amantoomu bhe Ompu Yesus Kristus.

Katumpuno lalo bhe sambaheano Paulus

1:3-11

³Taenomo afe'ulaikoomu, sadhia aefoampe katumpuno lalo ne Lahata'ala nesombaiku. ⁴Taenomo dua asambahea so kosasawimiu

^a 1:1 umondofaono umati, sakotu'uno: o diaken, ma'anano fo'ondofaono.

sadhia nowula sepali'a laloku. ⁵Notumpu laloku ne Lahata'ala mba'inomo hintimiu mealaomu dawu tulumi kanau'omu weo folele'ano Bhihita Metaa, notanda oleo kabhao-bhaono parasaee'omu, ta'ampamo aitu. ⁶Aparasaea mpuu Lahata'ala tumandakino kahadhaa metaa weo totono lalomiu ini, namokansuhue dua ampa natumoka ne oleo so kahato'ano Kristus Yesus.

⁷Daanumo nopantasimo akoponamisi peda aini ne kosasawimiu, kapa'amo meateomu weo totono laloku. Hintimiu mealaomu dua dawu ne taka kawa'aoku ne Lahata'ala, naetaa atitohongkumo ini, naetaa nandoo abebasi apotundu'ao bhe afotipande'ao kantoono Bhihita Metaa. ⁸Wutono Lahata'ala sakusiino pugauku ini: nokamba mpuu laloku apo'awa bhe hintimiu, kapa'amo aoasiangkoomu tapedamo kanini kaasino wutono Yesus Kristus.

⁹Sambaheaku sio-siomo kanini kaasimiu sadhulu-dhulu kabhahi ampa napontalabhi-labhi, nasedhulu'a dua mande'ao'omu kabanara bhe me'awaomu fekihi kotimbangi. ¹⁰Ane nada ana'a, mandemoomu mepiliomu foliuno kataa. Dadimiu naongkilo, pae nakodengo-dengoa ne oleo kahato'ano Kristus. ¹¹Ma'anano dadimiu naopono'ao podiu metaa nehabuno Yesus Kristus, nada sau kobhake metaano. Kosasawi'ae ini somo damekakalabhia'ao bhe damudhi'ao Lahata'ala.

Dodadi so Kristus

1:12-30

¹²Bhahitie'iku, gaoku mande'aaneomu putae kumadhadhia'ano ne idi ini ma'anano dotohongku kanau ini, mbali kaowu nofodhulu'ao ka'ewano lelenu Bhihita Metaa. ¹³Mba'inomo kadhadhia aitu, nentaleamo ne kosasawindo dhagano kamali bhe mie sigao'ano weo kota ini putae idi ini dotohongku kanau hampano afeompu ne Kristus. ¹⁴Mba'inomo dotohongku kanau, dobhahi dua bhahitie marasaeano ne kota ini sedhulu'a kamatangkano kaparasaeano ne Ompu, sampe sedhulu'a dua kakadondo, miinamo dakate'i-te'ia defolele bhoasaono Lahata'ala.

¹⁵Daanumo nandoo mie mefoleleno bhihitano Kristus dhohono kakonduno lalo ne idi bhe sadhia dopoindalo dopotagali, tamaka sigao'ano defolele bhihitano Kristus mai'ao ne totono lalo molahasi. ¹⁶Andoa melaano lalo ini dohabu peda aini mba'inomo kanini kaasindo ne Lahata'ala bhe ne idi, kapa'amo dopande'aane

kahato'aku ne ini so apotundu'ao Bhihita Metaa. ¹⁷Tamaka si-gao'ano sa'ituini defolele bhihitano Kristus nomai'ao ne totono lalo modai, do'ondofi kaowu faraluuno wutondo. Kuna'endomo habundo na'a natumubhahi kasabhaku weo katohongku ini.

¹⁸Ampamo kaowu pae naoafaa; tana'umala tanaongkilo patudhu-no, ingka bhihitano Kristus dofolelee, nada amai maka dua dhalano, kao'ia'akumo. Ka'iano laloku sadaa-daa, ¹⁹kapa'amo apande'aane mba'inomo sambaeamiu bhe katulumino Rohino Yesus Kristus damolapa kanau. ²⁰Nemokamba'aono laloku bhe neposahuna'aoku, putae nehabuku ini pae aoambanoanea, tamaka sadaa-daa aokado apugau, mangke-mangke ne waktuu aini. Neanomo mbadhaku ini somo mekalabhiano Kristus, naetaa weo dadiku, naetaa weo mateku. ²¹Dadiku ini so Kristus; mateku aabhiemo dua labaku. ²²Tamaka ane sadaa-daa adumadi ne dhunia ini, nokoma'ana kahadhaaku nasedhulu'a hasilino. Dadi'anomo miina amande'aane medano ae so nepiliku. ²³Kohaahonda'ae ini dopohela kanau: gaoku ahumunsa dhunia ini maka aeate bhe Kristus, kapa'amo ana'a foliuno kataa. ²⁴Tamaka nandoo nofaraluu so hintimiu adumadi ne dhunia ini. ²⁵Aparasaea mpuu bhe apande'aanemo putae nandoo sumadaa-daa aeate bhe hintimiu, neanomo sadhulu-dhulu katangkano kaparasaeamiu bhe kawulano lalomiu. ²⁶Ane asumuli kaowu we itu, hintimiu nasedhulu'a dua kawoseno bhakemiu ne Yesus Kristus mba'inomo idi.

²⁷Ampamo kaowu, kodadimiu tabeano naposahataa bhe wambano Bhihita Metaano Kristus. Ane nada ana'a, naetaa amai amohakoomu toha, naetaa pae amai ametingke kaowu bhihitamiu, tetewei amande'aane putae notangkamo kofindamiu, sepatudhuomu, sekakolaloomu poewangiomu so kaparasaea ne Bhihita Metaa. ²⁸Koe tihandaomu ne mie mewangikoomu, sadhia fekatangka lalomiu. Poewangi'amiu na'a somo katandaino andoa dabinasamo, hintimiu sumalamatiomu. Kosasawi'ae na'a nomai'ao ne Lahata'ala. ²⁹Kapa'amo Lahata'ala padamo nowa'angkoomu rahamati suano kaowu marasaea'omu, tamaka dua menamisiomu kakadee-dee so Kristus. ³⁰Aitu hintimiu mealaomu dua dawu weo poewangi'a pototo'ano bhe idi. Poewangi'a na'a ingka wohae'omu adhalangie endefi'ini sampe ta'ampamo aitu, pedamo nefetingkemiu itu.

Dase'ise bhe damekapanda wuto peda Kristus
2:1-11

2 Ingka notangkamo lalomiu mba'inomo se'isemoomu bhe Kristus. Ingka notilawesi dua lalomiu mba'inomo noniniangkoomu Kristus. Ingka pobhahi-bhahitie'omu weo kase'ise bhe Rohino Lahata'ala. Ingka pomoa-moasi'ao'omu, pomoni-monini'ao'omu. ²Dadi'anomo, hampano kosasawi'ae na'a, fosangka kana'eomu kawulano laloku: dadiomu sefekihi sekakolalo bhe sepatudhu, sekanini kaasi ne mie bhaimiu. ³Koise konihabuomu mba'inomo fekihi kaowu faraluuno wutomiu, tawa fekalangke diumiu. Tamaka fekapanda wutomiu, abhidaomu mie bhaimiu detaa dua andoa bhe wutomiu. ⁴Ondofao'omu faraluundo mie bhaimiu, koise ta'o kaowu faraluuno wutomiu seemie-seemie. ⁵Lalomiu tabeano napototo bhe lalono Kristus Yesus.

⁶ Mahingga Anoa sakotu'uno Lahata'ala,
miina nakopatudhu kanandoono pasae Lahata'ala
maitu namintahakie kansuhu.

⁷ Tamaka kosasawi'ae na'a nofosipulie,
maka nofokatu Wutono peda bhatua.
Anoa nokatu mie,
nodadi peda seemie manusia.

⁸ Anoa nofekapanda Wutono,
neangka mpuu ne Lahata'ala, sampe mate,
nomate te sau salipu.

⁹ Kanandoo'anomo Lahata'ala nosangkee te wawono
wawo,
maka nowa'ane nea te wawono sabhaha nea.

¹⁰ Neanomo weo neano Yesus sabhaha ndumandoono te
surugaa,
ne dhunia ini bhe we pandano dhunia, datumaohao
sombado ne Anoa.

¹¹ Kosasawindo na'a da'umakui putae Yesus Kristus maitu
o Ompu,
somo kakalabhiano Lahata'ala Amantoomu.

Tabeano dakotilanga peda kulipopo te lani
2:12-18

¹²Dadi'anomo bhahitie'i nemoasi'aoku, pedamo endefi'ini nandoo kanau bhe hintimiu sadhia angkafiomu katangahiku, mangkemangke aitu dopokodo'otiomu, gaoku mpuu sadaa-daa mangka kanau'omu. Ulei'e lalomiu so nasumangka'ao kasalamatimiu; dhalangie'omu weo kamihi bhe kafosibhala ne Lahata'ala. ¹³Kapa'amo wutono Lahata'ala kumahadhaano weo totono lalomiu, sampe undaomu bhe poolie'omu dhalangiomu patudhu metaano Lahata'ala.

¹⁴O ae maka dua habumiu metaa'ano, tahabumoomu, koise kamuntu-muntuomua, koise potaga-tagaliomua. ¹⁵Ane nada ana'a motiwohaemoomu ingka hintimiu ana'ino Lahata'ala tapa kodengo-dengono, metaano diu bhe melaano lalo, dumadino ne wunta-wuntando mie dhamani aini, kosikadhi modaino bhe kolilinono totono lalo. Hintimiu membaliomu tapedamo kulipopo te lani kotilangano ne wunta-wuntando andoa maitu, ¹⁶poowa fintahakiomu bhe fosampeomu bhihita meowano dadi. Ane dadimiu nada na'a, ne oleo kahato'ano Kristus, naowoseangkoomu bhakeku. Kapa'amo ana'a katandainomo miina nasumia-sia'a apogolo, miina dua nasumia-sia'a aowuleangkoomu, kahadhaaku noko-hasili.

¹⁷Bheanea damongko kanau, heaku kanggetumo kabubusino kapopanga nefoampemiu ne Lahata'ala. Kapopangamiu ana'a ma'ananoo kaparasaea weo feompumiu ne Lahata'ala. Ane nokotu'u nada ana'a, naowula laloku, ao'ia bhe kosasawimiu itu. ¹⁸Peda dua hintimiu, tabeano naowula lalomiu, mo'ia'omu bhe idi.

Timotius bhe Epafroditus
2:19-30

¹⁹Ane Ompu Yesus nofowa'ao kalalesa, aposahuna'ao paemo naomponaa atumudu Timotius namai'ikoomu, neanomo natalawesimo dua laloku ametingke bhihitamiu. ²⁰Kapa'amo ampamo kaowu Timotius ini sefekihi sekakolalono bhe idi; pakade anoa nokotu-kotu'u no'ondofao so kaetaa'amiu. ²¹Kapa'amo sigao'ano sanea do'ondofao kaowu faraluuno wutondo, suano faraluuno Yesus Kristus. ²²Ingka woahaemoomu bukutiino Timotius ini noko-fahalaamo, anoa sadhia notulumi kanau weo folele'ano Bhihita

Metaa, kabeanga anano bhe amano. ²³Satipande'aono losano parakaraku ini, patudhuku lasao atumudue namai'ikoomu. ²⁴Tamaka aparasaea mpuu, ane Ompu nama'a kanau kalalesa, paemo dua naomponaa ahumatokoomu wutoku.

²⁵Ampa aitu ponamisiku nofaraluu amosuliangkoomu bhahientoomu Epafroditus. Anoa ini tudue'omu nomai no'ondofao faraluuku. Padamo nopobhai kanau weo kahadhaaku, nembali dua tantara peda idi ini [so Bihita Metaa, ²⁶So katifosuli'ano, mba'inomo nokambamo sepali'a lalono ne kosasawimiu, nosabhamo bhe handano kapa'amo fetingkeomu nosaki. ²⁷Nokotu'u daanumo nosaki, noma'o namate. Tamaka Lahata'ala nobhelaane lalo. Suano kaowu ne anoa, tamaka ne idi dua, keana sadhulu-dhulu kakompeahano laloku. ²⁸Dadi'anomo sedhulu'amo dua kabhalano laloku amosuliangkoe'omu, neanomo po'awaaneomu kaowu mo'ia'omu, totono laloku nahumempomo dua. ²⁹Tahima metaa'eomu weo kawulano lalomiu peda seemie dua bhahitie weo Ompu. Fosibhaladaomu mie medano anoa ini. ³⁰Kapa'amo mba'inomo kahadhaano Kristus noma'o namate; anoa nopotaho'ao inawano nofokapo nekaemimiu weo ka'ondofaomiu ne idi.

3 Panda-pandano, bhahitie'iku, fowula lalomiu mba'inomo se'iseomu bhe Ompu. Miina naobhie laloku amendua'angkoomu nebhuhiku endefi'ini, hampano aitu netaa so katohopono kaparasaea [keana nepingka-pingka,].

Kapometaa sakotu'uno bhe Lahata'ala

3:2-11

²Kodhagaomu ne mie mehabuno modaino, kodhagaomu ne da'u andoa maitu, patudhundo dafofosuhu daesuna,^a gaha'a detoto kaowu ulundo mie. ³Gaha'aitumo sakotu'uno intaodiomu ini metahimano kasuna mpuu. Ma'anano intaodiomu ini nofoato Rohino Lahata'ala dosombaomu ne Anoa, nowose bhakentoomu hampano nehabuno Kristus Yesus. Pakade miina daposahuna'ao'omu ne kaengkoha'ano kamanusia bhe habu metaantoomu.

⁴Sakotu'uno idi ini bhe tingkuno dua aposahuna'ao ne kaengkoha'ano kamanusia bhe habu metaaku. Ane nandoo mie sigao'ano numamisino wutono noposahuna'ao ne medano ana'a,

^a 3:2 Weo fekihindo mie fofosuhuno na'a, ane miina'o daesunaa, miina'o nasumangkaa bhe miina'o nasumahaa kaparasaea ne Ompu Yesus.

mangke-mangkemo idi ini. ⁵ Ako'umuhu alu oleo dosuna kanaumo, kamungkulaku miendo Israel mai'aono ne sampu'ano Benyamin, aembali miendo Ibrani mpuu. Weo fintahaki'ano tubhono agama Yahudi, idi ini miendo Farisi. ⁶ Afoma-fomai laloku afodee-dee umati marasaeano ne Yesus. Ane do'ondo dadiku weo angkafi'ano tubhono agama Yahudi, idi ini miina akodengo-dengoa.

⁷ Kosasawi'ae na'a endefi'ini kuna'ekumo kanggetu laba so meowa kanau kasalamati, tamaka aitu akonaemo kahugi hampano Kristus. ⁸ Suano kaowu ta'o ana'a, tamaka kosasawi'ae maitu akonaemo kahugi mpuu ane apototoane bhe ne'awaku ampa aini: apopande'ao bhe Kristus Yesus Ompuku. Hampano Anoa kaengkoha'ano kamanusiaku bhe habu metaaku mada'ano ini ahunsaemo, akona'idamo dua hewu, neanomo a'umawa Kristus, ⁹ bhe kotu-kotu'u ase'ise bhe Anoa. Katitahima'aku ne Lahata'ala peda mie banara suanomo kaowule'ano wutoku adhalangi tubhono agama, tamaka katitahima'aku ne Lahata'ala mba'inomo aparasaea ne Kristus. Dadi'anomo katitahima'a peda mie banara na'a nomai'ao ne Lahata'ala, nengkoha ne kaparasaea ne Kristus. ¹⁰ Ampamo sehonda kapoindaloku: amande'ao Kristus, amande'ao dua kuasa kawanu'ano mai'ao ne mate, bhe aeala dawu weo kakadee-deeno, neanomo asekatu bhe Anoa weo mateno. ¹¹ Ane nada na'a, aposahuna'ao nada amai maka Lahata'ala tetewei namowanu kanau dua mai'ao ne mate.

Datumende ampa we tompano kaangka'a

3:12-21

¹² Miina amugau putae bhahi-bhahi'ae na'a apo'awaanemo, ma'anano aembalimo mie sumangkano totono lalo. Ampamo kaowu a'ule-ulei laloku bhaha'i kaowu a'umawa'ao kawa'ao nefontaa-ntaano Kristus, tapedamo mie pogolono tumendeno. Ana'aemo patudhuno Kristus nopundu kanau mbali fehebua'ano. ¹³ Bhahitie'iku, miina akofekihi putae kawa'ao na'a apooliemo. Tamaka nehabuku ampamo sehondano ini: miina aoheruane nekundokua, a'ule-ulei laloku so amooli'ao kawa'ao te wiseku. ¹⁴ Dadi'anomo atende kansuhu ahope we tompano kaangka'a, so ae'awa'ao kawa'aondo fotalono na'a, ma'anano dadi te surugaa. Ana'aemo patudhuno Lahata'ala nofosali'i noangka ne Kristus Yesus.

¹⁵Dadi'anomo intaodiomu ini motangkano kaparasaea tabeano dakofekihiomu nada kafoina'uku sa'ituini. Tamaka ane nandoo po'alati'ano fekihimi bhe ana'a, Lahata'ala namekantalea'iangkoe'omu dua. ¹⁶Ampamo kaowu, kafoina'u banara toka netahimantoomu, naetaa damangkafie'omu kansuhu.

¹⁷Bhahitie'iku, mesandahaomu ne idi. Padamo tafotiwohaa-ngkoomu sandaha metaa, dadi'anomo fotinda-tindae'omu mie mesandahano ne insaodi ini. ¹⁸Kapa'amo nentelamo afohatokoomu, aitu afendua'emo dua nopotuhu bhe luuku, putae dobhahi mie kodadindo nopowangi bhe patudhundo mateno Kristus te sau salipu. ¹⁹Dadindo nakopanda'ao kabinasa; nesombaindo i'ino handado. Nowose bhakendo dehabu timoambano'aono; fekihindo ampamo kaowu kafaraluuno dhunia. ²⁰Tamaka intaodiomu ini, o liwuntoomu ingka te surugaa. Surugaamo dua ana'a so kamai'ao'ano Omputo Fosalamatino Yesus Kristus nentaa-ntaantoomu. ²¹Nahumato kaowu Kristus nabhalii mbadha kasarantoomu monaleno ini naembali nasekatu bhe mbadhano wutono kumalabhiano. Kanandoo'ano peda ana'a mba'inomo Kristus nokokuasa namotuhu sabhaha ndumandoono ne wiseno.

Katangahi kapuliaono

4:1-9

4 Dadi'anomo bhahitie'i nemoasi'aoku, fekatangka kofindamiu weo kaparasaea ne Ompu nada nepulao'aoku na'a. Nokambaa-ngkoomu laloku, hintimiumo mekawulano laloku, mekawosenomo bhakeku. ²Euodia bhe Sintike, aesalo mpuu ne hintimiu hoduno: pometaa'omu, sekakolaloomu peda bhahitie weo Ompu. ³Hintu dua, posabhangka'aku mpuu, aesaloiko tulumida hobhine hoduno maitua. Kapa'amo andoa ini dokahadhaa mobhie bhe idi weo folele'ano Bihita Metaa, pedamo dua Klemens bhe sabhangka'iku sigao'ano kumahadhaano bhe idi. Neando andoa ini notibuhi weo Kitabindo Mie Dumadi.

⁴Sadhia fowula lalomiu mba'inomo se'iseomu bhe Ompu! Amendua'e toha: fowula lalomiu! ⁵Naetaa kamaluno lalomiu damande'aane sabhaha mie, kapa'amo Ompu noma'omo nahumatoa. ⁶Koe nokamihi-mihi lalomiu ne ae maka dua. Tamaka sadhia foampeomu kamesalomiu ne Lahata'ala weo sambahea bhe neati-miu. Kafaralumiu na'a fohatoaneomu Lahata'ala weo katumpuno

lalomiu. ⁷Ane nada ana'a, katohopono lalo mai'ao ne Lahata'ala tapa nelosangindo manusia, nadhumagani totono lalo bhe fekihi-miu toka se'iseno bhe Kristus Yesus.

⁸Panda-pandano bhahitie'iku, fekihimiu fosingi'ianeomu sabhaha giu metaa tipudhi'ano, ma'anano kumotu'u'ano, mantasi'ano, banara'ano, mongkilo'ano, mokesa'ano bhe metaa'ano fetingke'a. ⁹Dhalangiomu sabhaha nepoguhu'aomiu bhe netahimamiu mai'ao ne idi, naetaa nefetingkemi weo pugauku, naetaa newohamiu weo diuku. Maka Lahata'ala fowa'aono katohopono dadi napobhaia-ngkoomu.

**Katumpuno lalono Paulus mba'inomo ne'awa dhoi
kapakatundo umati
4:10-20**

¹⁰Weo dadiku se'iseno bhe Ompu, nowula sepali'a laloku, mba'inomo kaomponano ini kane'omo dua aitu salawaomu toha fekihi bhe ondofa kanau'omu. Daanumo sadhia fekihi kanau'omu, tamaka kaomponae ini miina sumalawaomu motiwohae'omua. ¹¹Apugau peda aini suano mba'inomo aokae, kapa'amo idi ini padamo apoguhu notumpumo laloku adadi'ao ampa ndumandoo'ano. ¹²Padamo aenamisi dadi weo kakae, padamo dua aenamisi dadi pontalabhi-labhino. Padamo apoguhane rahasioano do-dadi dewiseki sabhaha waweno dadi ne dhunia ini: koeateno dowe'i padamo, koeateno do'aho padamo, naetaa dadi pontalabhi-labhino, naetaa dadi weo kakae. ¹³Bhe katulumino Kristus ma'a kanau ka'osa, amondoi'e awiseki sabhaha waweno dadi.

¹⁴Mahinggamo peda ana'a, netaa dua habumi tulumi kanau'omu mealaomu dawu weo kasabhaku. ¹⁵Hintimiu miendo Filipi, ingka pande'aaneomu mpuu, pakaefoleleku Bhihita Metaa, wakutuuno ahunsa kadieno Makedonia endefi'ini, ampamo hintimiu umati marasaeano tumulumi kanaua. Ampamo hintimiu mealano dawu weo kakaeku na'a. ¹⁶Hampano nandoo kanau we Tesalonika, miina kaowu nasepakua mepakatu kanau'omu nefaraluuku. ¹⁷Ampamo kaowu suano kawa'aomiu na'a ne'ondofikua, tamaka hasilino habu metaamiu, kanggetu so katubhahino ponambomiu mada kaowu. ¹⁸Kosasawi'ae atahimaemo, noka-potiemu kafaraluuku, tanokolabhimo dua. Pada atahima kapakatumi ne Epafroditus, miinamo akonikaea. Kawa'aomiu ini

tapedamo kapopanga mowondu, meka'iano lalono Lahata'ala bhe nemoasi'aono. ¹⁹Lahata'ala nesombaiku namokapoangkoomu sabhaha kafaraluumiu namai'ao ne kahangkaeano Kristus Yesus pontalabhi-labhino. ²⁰Notifekalabhia mpuu Lahata'ala Amantoomu ampa suhue dhamani. Amin.

Kasongkono suha

4:21-23

²¹Fosampe kanau'omu salam ne kosasawindo umati mongkilono se'iseno bhe Kristus Yesus. Tahimaomu dua salam mai'ao ne bhahitie'i pobhai kanau ne ini. ²²Kosasawindo umati mongkilono ne kota aini defosampeangkoomu dua salam, mangke-mangke kumahadhaano weo kamalino Omputo Kaisar. ²³Sio-siomo kabarakatino Ompu Yesus Kristus napobhai'ao totono lalomiu.